

四庫全書

集部

欽定四庫全書

集部  
雲村集卷二

詳校官中書<sub>臣</sub>葉元符

中書<sub>臣</sub>劉源溥覆勘

覆校官主事<sub>臣</sub>李駿

校對官中書<sub>臣</sub>葉蘭

謄錄監生<sub>臣</sub>鄧培善

欽定四庫全書

集部六

雲邨文集

別集類五明

提要

臣等謹案雲邨文集十卷明許相卿撰相卿

有史漢方駕已著錄是集為相卿所自定簡  
擇頗精自序謂棄其脫遺不可讀者存其餘  
可讀者其自題絕句有曰雲村病老語多隴  
造次詩成絕宋腔還溯關元論風格拾遺壇

上樹旌幢蓋自以所學為未足欲進而求之  
唐人也今觀其詩大抵近體居多五言有大  
歷之調七言出入於陳師道陳與義間可謂  
自知之審矣章疏切實文體裁雅潔亦多有  
道之言無明季士大夫求名若渴之習殆篤  
實君子歟其歸田後與王子揚書稱時慮更  
切不敢以歸為幸乃今傳聞日駭事勢日危  
旦夕念北如昔之思南其惓惓君國之意視

所謂去國一身輕似葉高名千古重于山者  
相去蓋不啻倍蓰也乾隆四十二年二月恭  
校上

總纂官

臣

紀昀

臣

陸錫熊

臣

孫士毅

總

校

官

臣

陸

費

墀

欽定四庫全書



提要

欽定四庫全書

雲村集卷一

明 許相卿 撰

賦

蘿補堂賦

有序

蘿補堂者從吾董翁所自名其居也祈余賦之詞曰  
矗談嶺之亢峙眇澈湖之澄涵孤城值其秀爽而隱居  
卜於其間菅茅上覆泥堵周環恒雨暘之淋炙缺苦茲  
於東南主人仰屋太息曰狡兔三窟鷦鷯一枝咸克禦

外侮而圖寧居矧吾將榦前靈燕後昆顧無所庇吾廬  
乎爰躊躇其構思又般礪以殫慮衷若天啓謀與神會  
緊膠木之長蘿方下紫而上延彼徒贅於有餘我則病  
夫不完爾乃解自樹杪援之落端補此罅隙紆彼糾纏  
意祖少陵之詠巧奪媧皇之權老榦繫諸橈棟密蔓勻  
於疎椽柔枝盤旋以重複修條縷絡而蜩緣初蕭森兮  
扶疎久蒙密兮陰沉旁翳蒼兮紛敷上盤紆兮擁閼遠  
睇兮矯龍首而騫鳳翼迫視兮儼黃琮之間蒼玉春薦



芳慙可方杞菊夏布清陰弗讓修竹冬雪積而玉蛟結  
蟠秋風振而冰絃斷續晨則雲表之露下零宵而書檠  
之焰上燭殆造化有意毓茲堂之秀滌世氛之俗者也  
客有造堂下而進說曰上棟下宇中古盛制子獨矯情  
因陋仍廢夫瑣瑣數椽草而刳之曾不費子下筭之需  
潤筆之賄也主人輟然而笑適然而興顧謂客曰昔嘗  
議斯役矣圖厥新恐彰先陋而競俗侈葺以故懼蹈前  
愆而貽後累又嘗博觀今昔之變矣眈眈巨厦巍巍崇

宮拔地千尺在天半空計其壯麗悠永將與金石者同  
亡何勢窮理復化為塵蒙而已矣而此堂特借蘿以補  
茆任造化之經營役陰陽以刻雕潛德培其本餘澤潤  
其標吾聚族處於中也寒露不吾淒赫日不吾驕雷電  
不吾震撼風雨不吾飄颻容與委蛇其樂陶陶矧其易  
故增新我財不靡巧構密架人力不勞惟歷歲之愈久  
則維持之益牢蓋造物者輟其功則斯堂方就圯也而  
子得無以吾論為過高乎方將結陋巷為芳隣追巢居

於太古味道德之腴狎詩酒之侶標俗子而出諸戶高  
卧濶視藐富兒之土木齷齪鼠壤蟻垤無足數也言未  
既客謝曰命之矣逡巡而退

送齋賦

有序

東藩憲使原博查公榜其燕居所曰送齋屬予賦之  
於維美人之修嫿兮時兢兢以自防胡伊今之迺然兮  
童而習之以為常繫淵源其有自兮馴充養以成章親  
肇錫以嘉名兮曰約乎吾知爾之鮮失也師又傳之要

昔兮曰慎哉授子以予所自得也赫吾君仍寵綏兮曰  
惟忠焉予女嘉欽重巽之既申兮圖顧諟於不遐絢書  
紳之被躬兮顧曳婁其有時盤觴几牖為之銘兮懼造  
次之或違惟退食有常所兮爰高揭於楹楣時仰止以  
斂衽兮俯而凝神以覃思警心目於旦旦兮昭面命而  
申耳提大哉王言兮厥義兼乎父師矢畢此生其無負  
兮必為守身一字之符奉以周還而弗之墜失兮紛昌  
披以躑躅恣睢逞逸莫之檢制兮肆決繩而踰墨儵犯

患以冒災兮嗟嗟臍其安及旋名敗而親辱兮迄喪躬  
而危族惟昭鑒以痛懲兮彌惓惓而自勗羌何以躋於  
明兮匪前修焉所程出門儼如賓兮使民肅大祭之承  
凜燕居其猶齋兮承事畏於奉盈出往游衍嚴昊天日  
鑒兮矧夫立朝任使遐不惴惴於春冰抑聞無隱弗顯  
兮必慎屋漏而布於明廷無微弗巨兮能勤小物而大  
患以平無邇焉其弗遠兮決吾心之善利而千里之外  
萬世之後有徵貳將若此庶幾其無憾兮功以純而用

以宏曷嘗有辭於父師兮而君賜以稱闕然聖賢戶闕  
兮豈惟表於周行辭曰猗與懿兮德之載兮敬惟輿兮  
轍則義兮於不已兮由聖軌兮吾與子同逝兮

哀逝水賦

哀哉水之為物也浩浩乎窮四海而委形混混乎歷萬  
川而流行繫蒙泉之始發兮或檻出而旁通洎靈液之  
啓祕兮亦壑赴而科從上無高之不自兮沂銀潢而為  
蹤下無深之不入兮渺溟滓而為宮載四游以為極兮

涵九提而為封浴兩曜而出入兮吞列宿而渾融瀾三  
湘而滂七澤兮蕩屋靈而浥太空若迺時雨驟集潢汙  
橫流八埏伊阻平賦悠悠黃河逆上地軸橫抽沮洳成  
淵絕巘成丘禹功莫展丹績奚收及夫青娥告令白妝  
秉權洞庭葉下吳渚楓妍潢歸潦縮澤枯隰堅海斂而  
碣露磧江收而渚呈孺其往奚歸其洩何宣吾但見其  
亘古今繼日夜而東馳而日益長往而不舍指虞淵以  
為途兮迅方壺而遐征去益遠而返無由兮何西歸之

可憑謂尾閭之復宣兮氣益充而瀟瀟遂蒸翕而上下  
兮爰循環而相仍噫有是哉天地之生賴氣以成輕清  
上浮重濁下凝浮凝定位乾坤以名流峙羅列二氣之  
餘維斯水也一六之符氣入而盈氣縮而虛窮邃古而  
一軌豈斯今之可疑鑒斯流之不返撫人生之胡為羌  
朝露之易晞慨夕槿之就萎目睠睠兮若存魂飄飄兮  
如馳豈夫人之讐殃兮將修與短固有定數數固有之  
兮吾且信其必由理而寓理既宰斯兮諒惟善之是留



胡於今之不然兮乃背馳而殊路茲既執款誠而履柔  
淑兮獨中道而顛仆將修正之來咎兮抑此數適因時  
而昇賦每撫膺而浩歎兮涕橫墜而莫禦噫嗷閨門  
掩兮夜寥寂香徑空兮杳無迹青鸞沒兮金鏡塵寶玦  
冷兮沈煙息中饋空兮伏雌在蘋藻芳兮寧復采哀招  
九復兮魂不來白日忽兮掩藹渺深情於溟漠寄逝波  
於東海托沈瀾而通勤瀝余衷而莫悔觸余目而增歎  
攬予心之芥帶水濺濺兮東馳日杳杳兮西飛送冥鴻

今三太息夫人一去兮何時歸

雲村集卷一

欽定四庫全書

雲村集卷二

明 許相卿 撰

詩

五言律詩

晚晴

苦雨連旬日初晴一振衣  
殘雲依海嶠新水到柴扉  
僻性嫌山淺塵緣與世微  
斜陽疎樹裏清影日邊歸

暝色

暝色狹斜路幽懷長短吟殘虹猶薄海高鳥漸依林去  
住從吾道艱虞熱壯心燕雲愁直北望斷欲霑襟

霽色

霽色林廬晚愁吟野水灣斷雲虹外雨殘日鳥邊山海  
宇堪流涕朝班祇強顏獨嗟身世拙早見鬢毛斑

江上

天塹東南限神功混沌餘波濤來楚蜀雲雨被揚徐旅  
泊水村寺霸圖煙草墟親庭眇何許倚望獨躊躇

秋熱

秋空驕剽暑客舍困炎曦  
簷鼠時呈技淵龍或守雌  
山雲瞥眼度江月近人宜  
趺坐晚風扇焚香了化機

久雨

兀兀憑誰語悠悠祇獨棲  
雨深山更靜溪漲岸全低  
日月書生老風塵世路迷  
新晴散孤悶村酒正堪携

鄉思

目極南雲迥時驚北候新  
相然青瑣夢尚爾白綸巾  
恐

負平生學常懷寂寞濱潞河秋水永何處是歸津

夜坐

獨坐憂思集悲歌夜色遼疎林明遠火靜院急寒潮戎壘江南遍天閣冀北遥秋空穿病眼何日遣嫖姚

又八月望夜玉帶湖汎月

良夜不可負歸人還自留天間多病客月占兩中秋遠水疑通漢輕風穩送舟露華清到骨寒意問羊裘

送蔡天錫

鄉國來何晚風塵別更難  
天空落木外路迫朔雲端  
意氣時看劍悲歌幾控鞍  
春風消息好為報浙河干

夜過前峯僧舍

病客迷津舫清宵古寺門  
燈明深樹閣僧住遠人村  
煙月自良夜江湖多放言  
雲泉有舊約投老欲終焉

雪行和鄧士魯

雪意已彌望馬蹄還復行  
歸心先鴈遠病眼獨山明  
落同塵迹悠悠和古聲  
撩人奈佳句孤燭守寒更

宿石門山房

塵土三年夢雲林勝日遊小招聊擬賦多難獨憑樓月  
色千山午江光滿意秋心期應共汝投老白蘋洲

瓶山

小築不遠市高情還傍山塵緣甕天外風味麴生間瓦  
枕乾坤夢籜冠煙霧顏因君懷舊隱海上紫雲灣

贈何山人

愛酒何山子經年事遠遊雲煙幾兩屐湖海一扁舟白



眼無遺勝青囊有秘搜更休談望氣那復問封侯

章廣文夜至

孤燭十年別清尊今夕同宦游談歷歷衰病閔忡忡稅  
駕逢身健移家得歲豐浮生能幾會搔首歎萍蓬

夕汎有懷

幽意忽有屬呼尊上小舫乾坤新化理湖海眇逋逃水  
混秋空遠山留夕景高平生攜手好歲晚隔風濤

睡起

假寐凭殘易，瞢騰過晚鐘。  
斗旋秋氣肅，山應歲占豐。  
潛躍從吾道，暄涼自候蟲。  
腐儒經世業，多病已成翁。

大雪携鶴觀瀑

初雪壓高帽，羸驂揚遠鞭。  
玉龍僵欲死，白鶴舞爭妍。  
山僻地無主，骨清吾欲仙。  
長吟雜孤唳，歸路晚翩翩。

晚晴

歲晏田家隙，晚晴山日溫。  
幽人神獨往，古意俗誰論。  
陳迹雲霄路，閒身造化恩。  
風檐高士傳，曠代有知言。

再遊蘇臯祠

路憶秋風舊時逢燈事殘林深天忽暝春淺午猶寒  
畫壁蛛絲縵苔碑鳥篆刊自憐踪跡野到處得盤桓

晏起

晏起曝衡宇初春風物幽晴巒澄野旭融雪漲寒流  
謝俗飽閒味逃名疎貴游仙人眇何許吾亦擅丹丘

元日

雲村又元日春意亦閒門國事支頤笏年光落手尊客

携僧入社隣賀鶴生孫邈矣孤山老神交百世論

試杖

雲徑初扶杖江城欲罷燈書生全謝客行樂偶逢僧候  
鴈將辭澤遊鯈已負水湖山春意動遊興日騫騰

周氏別業

周郎結屋處風物畫中論晏坐泉園榻昏鐘斗掛門山  
光明遶屋海氣迥埋村望望吾廬近時來共一尊

董純卿至

我慙楊子宅君棹問奇舟今古談能劇高閒意自投春  
禽從聒聒道況只悠悠相望牛鳴地過從信去留

樂兒廟

霽色秋移舫晴雲午過壇廣川浮野動深樾到門寒麟  
閣心空在鵲枝迹已安高談入揮塵返棹見歸翰

南樓

幽興屬遐眺凭高散餘醺徘徊出海日解后還山雲度  
鳥江天永斷峯吳越分超然俯清曠何處有塵氛

西湖遲徐郎不至獨往林處士墓

勝會應空負幽懷亦自聊  
舟移六橋永衣振兩峯高  
簫鼓春遊競鳶魚野興豪  
孤山有真契獨往薦溪毛

漸翁夜過山中

寒夜平生友星江百里船  
風煙猶遠色虹月更新妍  
十載話通昔一真思入玄  
分携秋水岸悵詠白雲篇

張橫浦讀書臺舊題次韻

古臺全草沒閒戶半雲扃  
往哲猶生氣狂夫欲乞靈  
蝸

書陰鮮碧鳥破晚煙青高節存遺傳閒來讀舊銘

越人詩謁次韻

避俗雲村遠經秋客鬢新寒燈閒自喜殘卷閣還親往  
事悲歌永西風酒力淳明朝山雨歇曳屐訪天紳

或誦施西亭暮春之句淒然感懷追武其韻

石磴閒高眺溪鄉豁俯臨晴巒多爽氣春事已繁陰潮  
帶虹邊雨雲連鳥外林美人遺妙語惆悵細悲吟

兩翁來會前峯精舍

一別歲云改多病會常難天值清和景人來野水千底  
空藉芳草林缺認遙巒趺坐談方外吾生得大觀

春雨卧病朱陳兩翁至

山雨連村暗蘭舟二仲來過逢老多阻愁痛鬱初開綠  
樹春將謝紅塵夢久回高秋蘇病骨還約共登臺

夏日雨後 二首

村莊住山麓長薄帶晴川荷鋪通新水携壺餉遠田鳩  
聲時亂聒龍骨晚高懸好雨連宵永家家同晏眠



迢迢收殘雨幽懷步廣川對山哦得句坐樹課畦田嶺  
缺江光迥林疎日脚懸前村晚歸牧豐草散牛眠

廬山

斜日匡廬道生綃水墨圖勝難長句寫深稱列仙都雲  
失開先寺天連彭蠡湖遙聞栗里近慚愧擁車徒

夏日重遊雲巖寺

老去勝懷在重過支遁房亂藤當午暝深澗襲秋涼客  
路逢蒲節僧窓酌桂漿煙墟莽吳苑殘照醉歌長

董化卿尹宜興

水落歲云暮樓船發廣川春濃陽羨茗化接武城弦雲  
表鵲程迥江濱鷺社便善權巖洞好慰我遠遊篇

周二丈文弼挽辭

功名大槐夢冠劍一抔封清白高標在豪華此路同愁  
雲迷斷鴈衰草泣寒蛩一掬斯文淚飄隨宰相風

野泊遲朱陳兩翁

孤舟泊已暮二老來何遲深樹共寒意東流渺風漪閒

閒僧話續悄悄客懷羈  
返照長霞外容輝宛在斯

雲濤莊雪夜

江村堪老我寒夜更宜詩  
縞嶼歸禽訝玄機厚墊知  
水潭清數石雪路漫多岐  
若箇孤山宅逋翁得擅奇

元日

紀歷初更歲冰霜未放春  
年華東去水世事後來薪  
海宇風塵滿鷗鳬保社新  
壯圖難著手寬計作閒人

客詩問疾次韻

習懶仍兼病巖扉日日關心神猶紫禁嗅味奈青山世  
意同雲薄松陰伴鶴閒樓頭孤嶂近時得盡危攀

竹亭

曾聞居要竹今傍竹安亭寒意耿相對秋聲飽獨聽閒  
情數歷歷晏坐圍青青興到誰賓主柴門且莫扃

次韻范栗齋讀徐蘇傳

高人同厄運龍卧得身存矻矻賃春日勞勞抱甕園墅  
夫惟勝韻幽思寄清尊惆望堪誰語思君佇石根

和答西臯

郵筒忽落手展誦菊花前快意病魔遠通神詩力玄林  
昏風過野霜淨月臨田感子如蘭語興懷伐木篇

暮春雨後至孟家瀑

空林宿雨歇近郭曙鐘寒亂水斜吞徑殘雲弱傍灘泉  
聲人語細山氣客裘單老我足幽勝後誰應感歎

哭內 二首

束髮良嫵婉半途長別離浮生忽夢破浪迹尚塵縻寒

杼遺殘織空巢守伏雌總帷風雨夜怕誦庾信詩

偕老舊盟廢半生清影單好名吾獨累分謗子能賢淚

咽垂髫女吞聲執手言間闌句曲路

地名

憶著便潸然

五言絕句

晚渡

壓水雲欲墮吞江虹未收野人聊自適吹葦滿滄洲

春雨

霖霖林皋暗低迷草樹平春膏浹南野吾欲偶隣耕

七言律詩

通濟橋秋夕

雨過都門秋意多，憑欄慷慨酒微酡。  
壯懷端與長江誓，偉事猶聞故老歌。  
清禁樓臺涵月迥，九衢燈火共星羅。  
江東留滯青年晚，顧影滄波奈爾何。

客夜

敝裘十載風煙客，落木滿郊燈火村。  
吳岫白雲家遠近，瓦瓶濁酒自寒溫。  
山靈有約慙移櫂，世路多歧欲斷魂。

惆悵歲華今向晚  
擁衾豪思欲騰騫

江泊寄金山僧

曾憶高樓紫翠間  
孤舟今夜隔沙灣  
詩留吞海誰應護  
名刻朝陽石未刊  
三度長裾空禁掖  
百年清夢此江山  
驅馳尚冷東岡約  
不待移文已厚顏

彭城

萍蹤今日又彭城  
寒吹蕭蕭舞敝纓  
汴泗蛟鼉爭險壯  
濠梁煙月遞昏明  
東風苑陌春襟動  
午夜星河劒氣橫



曠代獨憐陳正字  
心期應不負平生

鄉思

鄉夢初殘曉禁鐘  
客懷無那轉忡忡  
丹心許國有如日  
病骨未秋先怯風  
空谷移文慚怨鶴  
長雲搔首羨冥鴻  
封章欲乞閒身去  
九杞泉頭理釣筒

趙村夜泊

經歲重來舊遊路  
荒郊殘日下高梧  
千艘燈火河成市  
五夜殷憂病獨癰  
新月隨人書屋近  
朔雲回首玉樓孤

腐儒通籍慙何補自合歸山問芋區

漱墅莫歸

殘日東風漱墅回輕雷挾雨馬頭催青山有約羈塵網  
四海多虞負酒杯寂寂野芳春事晚茫茫天運杞人哀  
燈前試拾新詩草滿紙憂吟取次裁

卧病

長夏寒疉擁病魔捲簾疎雨動高歌紛紜末俗矜兒劇  
突兀孤懷倚太阿榻上光陰詩草亂山中籌算藥爐多

新晴擬散頑腰脚遊興翩翩繞薜蘿

獨往

興到海濱成獨往千林風日淨娟娟寒山病骨晚爭瘦  
白鷺蒼波秋可憐天地閒愁塵夢醒煙霞勝事草堂偏  
斜陽深徑魚樵盡弄影蕭蕭石上泉

五畝山集用杜韻

桂樹青青賦小山棲遲我亦數公閒鷗鳬野水尋初約  
虎豹秋風擁九關采藥雲林聊寄迹請纓天闕尚強顏

王孫一飯終身意况復虛名國士班

懷玉驛

十載黃埃走病身憑茵驚見萬嶙峋  
遠人鳥語有真意過雨風光如暮春  
白日此心寧宦達青山與我故情親  
雲濤舊業應無恙猿鶴時來見夢頻

黃鶴樓公讌 二首

樓臺仙迹古城隅尊俎英僚勝會初  
全楚雄圖歸指顧清湘幽憤入躊躇  
江光蜿蜿晴虹迥沙渚娟娟野日虛

客子自多雲水意扁舟却羨洞庭漁

一雨江城五月涼重樓危檻俯蒼茫煙蕪七澤浮元氣  
晴樹千村動夕陽競挽龍舟懷正則遙思綵扇出明光  
高堂此日還蒲艾游子尊前憶故鄉

多病

多病倦游聊作計負山臨壑結茆堂釣竿入手江湖遠  
書卷蒙頭日月長春服初乘沂水興午風時度藥畦香  
漫勞過客談經濟習懶年來樂睡鄉

春日汎湖望海

雨閣春雲遲客遊  
荻灘桃浪信輕舟  
病身祇合伴孤鶴  
健語猶堪回萬牛  
隴樹陰成悲宿土  
煙蕪影斷見浮丘  
沙棠擬續招尋興  
更汎蓬萊清淺流

雨夜客至

曲几團蒲午夢殘  
鶴聲報客小橋灣  
翠屏寒暎萬銀竹  
絳蠟秋酣兩玉山  
道意自慙違俗累  
酒船真負問奇還  
紫萸黃菊重陽近  
突兀星厓擬再攀

高卧

病夫高卧星厓上野情幽事静相宜晚山如揖抗塵表  
晴雲有時來坐隅閒人日月衣裳懶勝地禽魚造化私  
汗青尚論百世士栗里蘓門我得師

石門西村勾溪至

野人淪放紫雲谷勝友連翩根竺村古渡晚寒初艤棹  
萬峯秋静獨開門歷探幽壑尋三秀深話清鐙卧兩尊  
不厭山家淡風物還來茆屋負朝暄

徐襄陽過訪草堂

野情於世自蜩鷃一壑蓬蒿手自營  
昭曠觀游心獨領  
狹斜岐路夢還驚柴門反鎖封秋蘚  
畫舫深維探晚英  
滿意對牀泉石話三年剛得此懷傾

元日卧病

瘦骨棲遲榻欲穿春風被野獨高眠  
紛紛過眼人疑夢  
兀兀支頤象入玄如願漫陳兒女語  
屢端遙祝華嵩年  
冥冥元化吾誰詰深擁臯比理絕編



玄覽亭小坐懷白鶴山人

遠寺疎鐘送夕陽  
危闌獨凭放歌長  
高鴻望迥暮天碧  
野蝶愁牽霜葉黃  
對影作雙真自愛  
百年強半尚須忙  
深踪懶性過從斷  
猶憶清吟舊楚狂

次韻鍾西臯雨中述懷

苦雨經旬淹淑景  
早雷十日驗餘寒  
庭梅寂寂簾前落  
湖草青青鏡裏看  
深谷鶯花全冷淡  
浮家雲水尚盤桓  
殷憂無賴誰堪話  
搔首斜陽獨倚闌

應容菴書至使者贄詩私覲病中和答

寒林斜日動柴門一舸遥遥入海村  
七字通名孤解后尺書歌枕得溫存  
京華消息關心遠野戍風煙望眼昏  
萬里江湖分終老平生贈處欲重論

次韻黃東河春日有懷

老我乾坤七十年雲林強半有閒緣  
紛紜野史乖麟筆次第山窓理蠹編  
倚杖松根哦落景據梧石上譜飛泉  
長安赫赫乘軒子應笑空齋守太玄

劉海村詩問次韻

感歎壺頭念少游  
危蹤到處浪淹留  
青山食力荒三徑  
白首携家訪十洲  
夏半梅黃憐節物  
雨深苔翠上衣裘  
四郊戰骨繁芳草  
斜日孤城怯凭樓

入春避地漱水秋盡還山西臯詩慰次韻

寄迹荒城似謫居  
還家病骨戀簞輿

病股三年雙足不能履地

山橫

雨翠秋容淨  
林缺霜紅野  
眺舒憂國多虞懷  
耿耿信天  
定分意如如  
獨憐萬卷成焦土  
遺恨連艘失載書

分酒遺董漢陽依謝韻

滿城風雨怕開門，狼籍春泥少更分。  
細帙散陳閒晝晷，山廬在望隔秋雲。  
中軍李牧誰今許，東海田橫異昔聞。  
病思時艱徒懊惱，酒盃詩卷謾酣醺。

山遊

杞山秋高風日好，獨扶藜杖步晴岡。  
達觀浮世身如寄，任俠當年氣自降。  
雲水茫茫去鳥沒，煙霞隱隱歸樵雙。  
清林孤眺坐成晚，遙見疎林明夜缸。

有感

欲向西風酌一尊乾坤何處著英魂百年事過風前燭  
千古名傳海上村香火半龕誰地主孫枝一葉是君恩  
夕陽滿地傷心淚付與江流自吐吞

謝別沈默齋

僦居殘夏入高秋世難存身迹漫投瘦骨稜層刈坐榻  
故鄉艱阻賦登樓山中猿鶴多歸夢天末風煙倍客愁  
萬類兩間同逆旅遠遊還問武陵舟

再別呂東匯

涉歷危途次水村支離病骨傍人門滿林楓葉秋聲碎  
四壁寒蛩夜語繁客況春溫懷地主隣家社會憶鄉園  
卜携便覺情無限回首霜空欲斷魂

春暮懷王鶴山

三月風光今又暮四郊雨意喜全收春愁無那憑桑落  
午夢將成破粟留鄉國創夷誰側席故人丰采獨登樓  
空林暮色增惆悵何日東岡續舊遊

除夕感懷

酒冷香銷夢不成  
逼人殊覺歲崢嶸  
老如舊歷渾無用  
醉戀殘燈亦暫明  
雪霰已應隨臘盡  
梅花寧復與春爭  
向來筋力虛名盡  
白髮無愁也自生

次韻蘇叔豹見憶

詩句遠投多病客  
野心無那不羈猿  
秋來曠度頻縈夢  
老去端居獨寤言  
困鶴風雲羞短翮  
蹲鴟伏臘飽荒園  
剡舟遲爾維星石  
起我高談雪浪翻

雨宿真如寺

夜雨僧齋滯客輿清燈高榻信吾廬玄談種種浮生外  
茗碗深深坐醉餘雲路造天無款段野情隨地有華胥  
廿年回首紅塵夢寒影空堂自愛予

初春海上

積雨晨收好風日瘦藤危屐試春袍山中日月人空老  
海上煙雲興獨豪隱約野芳初亂眼鬱紆幽思欲揮毫  
詠歸樵徑者誰子徙倚殘陽首重搔



夜坐

開門見月來松徑掃地移牀傍石渠寂歷寒蛩共清夜  
吐嗟浮世托蘧廬黃虞道在生何後溝壑盟尋老只初  
一咏一觴還自笑明時野調獨迂疎

秋晚溪上

坐占清溪瘦石雙風流想像鹿門龐高歌草澤時空晏  
卑睨雲臺氣已降老去閒愁消短楫醉來佳句墮寒江  
歸輿伊軋松堂晚零亂殘陽上半窓

九日

感時今日重陽節扶病雲村第一峯  
黃菊深盃桑落酒青山高帽日斜風  
道違末俗空孤憤詩與秋濤合並雄  
忽憶蘇門遙悵望欲家遼海謝過逢

寓蕭寺

病客閒情與世疎  
息肩聊得借僧居  
夢殘午枕鶯聲裡  
詩滿橋亭野色初  
經濟有懷猶浪迹  
乾坤到處是吾廬  
十年世路塵勞障  
來謁禪關得起予

夜客對雨

風雨茅堂入夜寒一尊相對共清歡  
盟深魚鳥便林壑病中煙嵐痼肺肝  
孤燭話殘衣袖薄小山賦就茗甌寬  
老懷時事頻驚慨意氣相逢引劍看

下第歸寫懷

官渡雨中歸夜艇舞雩風裏弄春袍  
九衢華轂不到夢百畝荒苗自策勞  
野性如僧安地癖俗情無物破天弢  
斜陽瘦影蒼茫外清興寒山合並高

麥山老人

麥翁清時甘陸沈蹤跡迢迢煙霧深石轉醉眠月皎皎  
松園晏坐秋陰陰閒携隻影雲隨屐幾見行人雪滿簪  
朝市語聞應洗耳登高為賦考槃吟

趙漸翁七秩初度有詩次韻奉壽

憶昔天門曙色開連翩並馬直廬回高翰徼外清風播  
遐壽壺中紫氣來別圃序芳觀物興平槎對景擅場才  
村翁許入香山社雅祝還稱北海盃

祝思允宅夜宴

殘陽隱地紅炯炯角中弄影青離離  
暝煙散空歸鳥下  
白露被野寒蟲悲劇談雜出觴政亂  
佳句欲吐燈花知  
小人夙抱杞狂疾假日偷歡同鷓鴣

和荅鍾西臯

閑雨長歌雲漢什得秋賸有大田風  
新涼病骨逡巡健  
野水漁舟遠近通清夢有徵多勝事  
舊題無處不塵籠  
扶携擬踏西臯路共采芙蓉帶路叢

和答徐光澤

一絨三月紫雲灣  
迹棲遲鹿豕間  
兆喜燈花符昔夜  
擅場詩句破衰顏  
病身遙謝金閨籍  
草坐常從野老班  
自愛山村涼意早  
溪南楓葉未秋丹

和答鍾西臯

一聲秋信葉邊聞  
早見西風度朔雲  
塵鏡紅顏吾喪我  
雪舟清興客懷君  
壺頭閱世時何晚  
谷口耕巖日自曛  
撫手知言千載上  
蘇門長嘯有遺文

中秋夜湖舟對月

一年好月是中秋向夕呼船抱病游  
大地清輝翻白晝良宵幽興屬滄洲  
湖山夜色孤蓬遠天水寒光兩鏡浮  
酣坐不知吟嘯永闌干北斗挂峯頭

次韻溪翁春日天寧寺樓

闌干徒倚雪晴初十日東風百草蘇  
金晉夕烽清塞徹片帆春興滿江湖  
漫堤新水鷗前永過雨遙岑鴈外孤  
千里河山閒放目壯遊曾憶賦三都

村翁詩賀堂成次韻

小築巖居俯釣臺更亭絕巘望天台

予憶台友作霞標亭望之

入春

窮谷還桃李避地閒門自草萊叩石商歌涼月上捲簾  
滄海暮潮回多情張老斯千頃匝屋煙雲為爾開

次韻鍾西臯見憶

落木殘陽獨倚樓歸雲寒擁晚山稠煙霏好語傳雙鯉  
湖海閒身擅一丘塞北戎心驕未格江南民病愧先憂  
孤燈長劒空三歎衰鬢繁霜奈九秋



送友

棘寺高材起陸沈  
翩翩白馬向楓林  
歌聲相續山村靜  
別意無端江水深  
千里霜威生畫戟  
孤城秋色上瑤琴  
病夫悵望留無計  
寒月荒郊後夜心

和西臯

手啓郵筒伐木篇  
樵歌接響賴俱傳  
吟安七字雪髭短  
夢醒半牕山月圓  
澹泊閒心雲共遠  
蕭條生事俗無牽  
巖頭卜歲隣翁賀  
水柱闌干凍瀑泉

南樓

清吟獨凭山樓晚黃落空悲海國秋  
遯世野情從棄置  
安巢歸翼自嚶嚶  
勲名夢斷圖煙閣  
病力時看理釣舟  
歲晏陰晴苦難料  
竹椽桑土漫綢繆

秋晚登山

衰病深村過客稀  
經秋短布一衫衣  
日邊巧宦名爭顯  
澤畔幽人見獨非  
薄暮雲屏空翠重  
疎林霜柿熟紅肥  
山頭抱犢歸來晚  
歷亂殘陽滿澗扉

西臯先生季夏詩來俯慰寥泝僕病甚秋半差  
強展詠三復次韻謝兼簡西村勾溪二翁

懷人詩句綠陰暮抱膝怡情紅樹村木榻漸移當蔭石  
角巾時倚傍溪門松陰晴景湖天迥沙磧秋光海氣吞  
白髮青山老知己徘徊吟弄入黃昏

七言絕句

奉餞季父之永州倅依韻

殘日遠峯明陸離別情惆悵風前盃竹林今古清風在

猿鶴東山首重回

山閣

衫浥嵐光先雨潤  
樹酣江氣未秋丹  
飛流千尺憑闌外  
并作蕭蕭六月寒

春病

山日冥濛籠野煙  
碧桃紅杏鬪春妍  
老夫獨負看花約  
布被蒙頭白晝眠

雪蘭

金谷妍華空毀垣  
國香水霰自孤根  
輞川強項芭蕉伴  
共謝東皇費手援

泊鉅野

凍雲寒月遞昏明  
游子躊躇怯遠征  
身在畏途親在夢  
魂消飛霰打蓬聲

秋晚

遠浦長霞弄晚晴  
釣絲搖颺拂滄瀛  
幽懷自適無誰語  
寒日秋波盡意明

簡瞻仲乞醉翁牀

醉翁牀乞病翁眠瘦骨今年減舊年歌枕更無蕉鹿夢  
面屏時學野狐禪

越人遺履

三年病縛登山脚一兩郵傳過海緘自笑元非珠履客  
正須雲磴踏巉巖

勾溪和什來再用原韻

夢斷紛華幾歲年煙雲況味只蕭然草玄筆硯消長晝

今雨都忘舊雨船

金山吞海亭

江面峯頭巧著亭  
澄波玉宇兩爭清  
倚闌客子心如水  
何事沙鷗亦浪驚

歸夢

故山秋老親闈冷  
游子夜長歸夢多  
獨倚蒼茫動幽興  
却慚容易脫漁蓑

歸期

歸期屈指已無多，木葉蕭蕭笠澤波。  
只尺三高英爽在，笑懷懷檄又經過。

沈公橋

兩涯寒碧成周道，千尺晴虹跨水雲。  
別浦歸人多悵望，斜陽搔首劇思君。

過扇依韻

秋風桂子又三年，阿過寒牕笑上竿。  
賴得郎罷迂濶甚，掄魁原作技兒看。



憑几

海宇浮雲幾去來山村佳處獨徘徊春光已謝還秋信  
天只峯頭夢未回

尾溪

海上煙雲朝暮奇山中日月了殘棋秋來無那頑腰脚  
得句尋僧過尾溪

畫扇贈豐厓

遠路歸來已白頭豐厓猶似舊時秋長藤短褐行吟處

不道山翁是故侯

九日雨嘲客負約

雨作重陽妬勝遊  
登山有約望來不  
却憐刺客能高興  
風雨漫天夜放舟

題畫寄梁仲

海上春山眇莽中  
長藤到處識髯翁  
貴游無數花間騎  
萬態風光適意同

詩成

雲村病老語多囀  
造次詩成雜宋腔  
還遡開元論風格  
拾遺壇上樹旌幢

震澤歸寄前峯僧

千里煙波一日程  
勝游猶恨欠山僧  
夜歸劇憶前峯翠  
曉起闌干試一憑

月林僧舍

月午天霜破衲寒  
梵音蕭颯度林端  
經殘香燼秋寒次  
時有風枝語夜闌

金粟蘭若

野老山僧意味真，瘦筇高笠往來頻。  
十年著我東林社，更道何曾見一人。

望雲

郊原新綠正豐茸，晏起鈎簾曉霧空。  
造化無邊生意浹，春雲彌望濕東風。

徐南塘惠借袁海叟集附謝

柳風桃日滿林廬，湘帙緘開午夢餘。  
詩律沿唐追晉魏，

一編落手得權輿

招顧寅齋

胷蟠萬卷隱飢雷造物從來慣忘才何許詩窮報消息  
春泥帶雨一尊開

賦秋泉

微霜昨夜下庭柯東岫朝來爽氣多偶過溪橋探三秀  
驚看白髮照滄波

南橋

一曲溪流兩岸松石梁  
蜿蜒卧晴虹  
磴磴拄杖歸來晚  
月挂東林屋上峯

復陳勾溪

此地重來已十年  
林廬水檻故依然  
過門不是忘相見  
剛有東風送客船

聞翁七袞

幽人萬遍課參同  
只恐勞生事事慵  
高枕山房還靜聽  
十千八百五更鐘

春雨卧病朱陳兩翁至

一丘高卧間雲共二老相遇舊雨同續續江湖十年話  
支離病骨起春風

除夕

一年將盡此黃昏坐撥殘爐火尚溫六十來人今曉事  
春風一夜到柴門

魯山

周行轍迹幾經年故國青山夢寐牽桑梓迷陰丘首地

慶雲爛漫帝鄉邊

次韻西臯感事 四首

野人無意卜潛虛  
眉宇間愁久破除  
白髮青山隨拄杖  
殘骸羸是乞來餘

十日開門風葉多  
病懷今已入無何  
嗟卑歎老真癡絕  
昨見黃童髮又皤

堯年九歎今始收  
滿車穰稬勝封侯  
葛巾漉得新缸面  
客過山前底死留



不問金華舊牧羊屋頭丹井半苔荒  
凌雲賦就多仙意  
笑託山靈酌一觴

野泊

滄江茫茫白鳥度丹崖冉冉晴雲流  
舟橫野渡倚殘照  
日短風煙生暮愁

湖外郊行

青鞵短策湖雲東  
澗撥妙語酌春工  
野煙漠漠吞江樹  
晴雨絲絲織晚空

一竹

薇蕨聲沈舊業空  
首陽何處訪高蹤  
冰霜大地同搖落  
挺立孫枝殿朔風

觀化

諱日作

管領雲泉四十春  
乾坤閒處老閒人  
却憐故物還元化  
光屬星河射海垠

諸弟秋試

六言附

羣季秋風桂子病  
夫夜雨蒲團黃妳  
味餘雋永青雲望

入高寒

下邳阻風

家近心情如醉路難風浪拍天春雲過眼無賴野日蒙頭獨眠

排律 二首

雪遊雲岫峯

深雪撩狂興長蓑弄曉寒翠凌孤突兀玉拱萬巒屹勢合疑色地塵空愜凭闌野情多僻尚閒處擅奇觀得句

浮眉宇抒思入渺漫詩魂清到骨仙意欲騰翰認路樵  
無跡題名竹有癥餘生饒樂事無地著憂端

天只峯晏坐

多病連三歲閒情擅一丘杖錢疎後計方藥慣前籌白  
首紛如歎青山黯爾愁孤衷危聖主奇數負通侯盤澗  
從真隱詞場謝昔游揚雄奇異代鄭谷許同流

古體

山行

小窓睡新足起視時何其落日餘山椒樹顛紅陸離快  
哉情景新一散頑腰肢登登悄誰與瘦影自崛竒鶯花  
非故妍泉石含新姿關河怯回首直北多軍麾封侯一  
劍任誰當請丸泥祇恐廊廟憂不在潢池兒熏風低草  
樹戟髯不受吹徙倚蒼石根憂端與山齊

早春入山詹仲携酒野酌笑詠成詩

仲氏有幽興訪我春山中冰霜策老馬觴豆驅孱童煙  
雲滿懷袖那復塵土容空谷喜足音真樂況天衷寒潮

俯東岫晴暄負南榮酌言永今日詠歸聊短筇

古意

新月生西嶺明河低遠林坐見大火中秋序忽已侵感  
歎老將至裴回勞我心勞心復誰語撫弄東廂琴調高  
曲未竟寡和難為音矯首丈江子何時宣此襟

諸弟夜集

獻歲閔霖潦今夕欣澄和況我遠游歸兄弟會匪他晏  
晏言笑洽楚楚壺尊羅東風舉衣袖明月在庭柯一觴

再三詠舞影時婆娑荏苒百年內白日去如波載懷秉  
燭賢不樂如夜何

和荅沈紫硤

我本山澤癯結廬白雲岑豈獨遠塵土風雨亦俯臨朝  
陽讀吾書卒業羣壑陰赤手莫援世敢云長往心江山  
入捫虱形神調戲禽新暑不到牕空庭梧十尋故人遙  
相憶因風遺好音硤上有初約莫辭山路深

次韻西村老人見寄

眇予媿諧俗衡門日重闢木榻已漆敝草屋多苔斑緬  
懷結髮期抗志夷惠班乘時冀陳力翊世姚姒間馳光  
忽晚晚驚波逝潺湲悠悠違夙心戚戚長苦顏百年貴  
適意青陽寧後還明月皎東林流煙淡前山潛居勗明  
德哲人猶可攀

從吾道人解湘竹詩筒倩玉芝僧斷冠贈予侑  
以長歌倚韻奉謝

牛腰詩卷難著筒截冠汗髮生清風憔悴頭顱角巾敝



逍遙湖海荷衣同道人游戲三昧手摩娑持似雲村翁  
切雲更著杞泉笠御風戴雨淩煙藁貂蟬兕牟浪軒輊  
物何與吾吾亦空星涯寒影炯秋水蘿石吟魂開我衷  
晴郊吟美無長物頂頂作伴靈鳩筇半酣濯髮挂林杪  
祇恐吾家習氣不耐顛風播美聒聒鳴長松

懶習

卧病歲強半懶習乃成性巾屨不時御散髮還高詠避  
世迹盡掃懷古心獨競經旬未下堂花鳥苦相迎登山

俯周行吾道終靜靜

秋晚

晨光動林薄水竹炯清佳  
寒日射水中萬竹走龍蛇  
美人秋雲東相望眇天涯  
招招踏澄江來把芙蓉花

古意

朱夏忽云謝西原凜秋色  
流光驚電駛我心悚以惻  
生也信有涯漆園真達識  
勢利誇毗子去道遠已極  
優哉復優哉冥心任通塞

南城樓集

坐瞰重溟八千尺，悵望蓬丘桃已核。  
飄飄直欲凌紫煙，何物虛名論赫奕。  
指揮如意按悲歌，徒倚女牆扶瘦腋。  
咄哉世事覆更翻，老矣夕郎玄尚白。  
習池峴首今蒿萊，轉眼茲遊雪鴻迹。  
林缺長虹浙河暝，鳥外殘陽越山夕。  
童冠薰風笑詠歸，三年病懷聊一適。  
掀髯清嘯動海壖，豪宕從來曾此客。


贈姚楊江

黑頭使君俄挂冠出在人後歸在先盛世勲名太早計  
半生林壑有閒緣蠻煙瘴霧驚餘夢高筇長鏡終百年  
過客東溪問津處掉頭野水棹漁船

廣薤露歌

諱日自詠

薤露聲那復歌有生歸盡定不易苦調哀切將奈何齊  
橫漢季等黃土曳紼之徒祇合歌樂送我歸山阿哀樂  
於吾兩何有達者玩世生死造化昧端倪乃今獨解衆  
悟理則那



雲村集卷二

欽定四庫全書

集部  
雲村集卷三

詳校官中書<sub>臣</sub>葉元符

中書<sub>臣</sub>劉源溥覆勘

覆校官主事<sub>臣</sub>李駿

校對官中書<sub>臣</sub>葉蘭

校對官中書<sub>臣</sub>李荃

謄錄監生<sub>臣</sub>鄧培善

謄錄監生<sub>臣</sub>曹希焜

欽定四庫全書

雲村集卷三

明 許相卿 撰

封事

論內侍納銀贖死

題為信初命誅兇孽以慰神人事臣聞令出惟行弗惟  
反又聞曰有功不賞有罪不刑堯舜不能以為治信然  
哉則臣於今日斷獄不能無惑焉而職司獻納是謂得  
言遭逢聖明是謂可言於此嘿嘿臣無所逃罪故敢陳



其愚忠幸陛下裁納竊照犯人某等罪惡臣不能徧以  
疏舉其屢訊而具服者載於刑書渙於綸音炳如也有  
一於此罪不容誅衆惡畢彰百死莫贖又何議乎方其  
憑寵靈擅威柄毒流怨積以致神器幾危逆藩乘隙先  
帝憂勞崩逝屬階禍本實自羣兇臣意孝廟神靈之震  
怒兩宮慈愛之痛忿天下臣子之悼恨而舉欲甘心焉  
者殆皆鬱積磅礴無所於逞臣又意興獻帝之在潛藩  
憂本根之將顛思休戚之與共切齒憤懣何以為情陛

下旦夕視膳蓋嘗經於暗記矣迺者登極首逮兇邪列  
聖格歆薄海悅服端始於此而數月以來天誅尚逋明  
旨中草元姦巨慝許之減死贖金斯言一傳羣望大駭  
詎意正始渙號遽已棄信失刑神怒紆而再鬱人怨解  
而復結不知陛下何以對越孝廟何以承顏慈壽何以  
上慰興獻帝之靈何以布大信於天下臣民是以前日  
人心庶幾孝皇太平之望比來識者慮有正德紛紜之  
漸矣先帝已誤陛下豈容再誤耶且昔者不察而墮姦

法固在也今也獄成而聽贖并與法而亡之矣祖宗勞神遠慮立法為千萬世之防陛下祇博數十萬金以廢之豈不甚可惜哉政以賄成法由近格臣恐自今人皆不復畏法惟務積金有金而罪無不免以必免之計肆無涯之心臣又恐將來禍亂不但頃歲之幾危而已然羣兇得肆於昔所謂非一朝一夕之故猶可說也彼於陛下無糞除之勤無阿保之舊而亦欲僥倖以釋愆罍以續要領果何術也恃左右者先為之容也左右之為

此度已異日之將出於此故力為之地所以自為地也  
臣以為若人亦可誅也不獨若人也刑部尚書某都察  
院右都御史某操三尺法司天下命古臯陶之任也干  
紀羣兇不能亟議早決故爾遷延曲為比附雜然衆犯  
概以大辟原其意非欲援輕以入重迺欲推重以附輕  
俾得徐肆寅緣巧惑聰聽矧大獄未竟堅疏乞歸不圖  
始終不聞執奏避事保身殊非大臣守職任怨之義臣  
聞春秋治惡必先黨與某等尤可罪也如蒙乞勅法司

將其等首惡悉照原擬明正典刑其餘某等亟竄放逐并左右先容者連坐黨惡以謝天下仍黜某等以為舞法利姦之戒宗社幸甚天下幸甚

論內侍義男廕官

題為裁倖恩以伸公論事臣聞爵入於朝與衆共之刑人於市與衆棄之衆則論公公則民服故刑賞者人主所得專而不得私也頃者欽準廕授太監張欽義男李賢錦衣衛世襲指揮同知一時騰物議乖舊章累新政

有必不可者兵部尚書彭澤肇言之兵科給事中許復禮等又言之工科左給事中安盤又言之人三為衆人不啻三論亦公矣而陛下初諭曰已有成命了再諭曰已有旨了三諭曰該衙門知道是必欲私之也夫朝廷之政公則一致私則萬殊恐中外貪競小人自此乘隙躡踵有非分無厭之求許之名器黷濫何以成朝廷不許則是業已啓之而何以阻之臣聞故兵部尚書于謙再造社稷官其子冕為錦衣千戶今兵部尚書王守仁

克平汀贛官其子正憲為錦衣百戶賢非欽之子欽之  
隸耳欽非二臣比而賢官崇於冕與正憲是忠勲大臣  
之子曾不若近倖中人之奴天下徇國死事之臣其誰  
不解體然則欽為亂國經澤等為失官守臣等為負言  
責陛下守祖宗之法亦似少失初意矣陛下念欽使令  
之適服役之久寵以賜金優以加俸識者猶曰非德賞  
也而濫恩如此人言如此陛下尚吝而持之豈欽甘言  
媚謁有蠱奪寵靈之巧而衆方蛇盤蚓結陰伺曲贊又

將藉為他日之地者乎陛下重違內豎而輕拒士大夫也董仲舒曰天人相與之際甚可畏也嘉靖建元以來冬無積雪春多霾風意者刑縱賞濫號令失常之應陛下亦嘗槩於中而求其端矣乎臣為是懼伏望寢前命禱賢官以重爵賞以回天意亦以塞小人非望之圖成清朝無私之政臣不勝惓惓

論政權

題為體剛德操政權以折姦防亂事臣惟天下政權必



出於一一則治二三則亂上操則治下擅則亂賢公卿大夫士衛翼奉行之則治匪人僭干之則亂臣嘗稽往迹叅近事以此推之百不失一故於今日誦詔令窺政權切慮深疑殷憂大懼繼之涕泣不能自己凡在有位義當亟聞臣待罪言官若更隱忍死不償責是以冒昧言之伏惟仁聖察愚忠而裁其罪竊睹陛下入繼大統御席未寧登用耆德嘉納忠諫申勅法守裁抑僥倖竄殛兇邪不旬月間盡復祖宗之舊可謂明也已矣可謂

剛也已矣海內欣欣引領屈指以期治平曾未再期偏  
聽私撓執政乖令日以益甚殆陛下明少蔽乎剛少懦  
乎操權未得其術而陰伺巧移以謀矯竊者居中似有  
人乎臣恐自今漸實生習習實生常他日矯以疎大臣  
矯以逐諫士矯以徼玩好矯以興土木矯以事邊功矯  
以私刑賞將來之禍不可稱諱雖有智者亦無以善其  
後矣臣為是懼請得舍其細論其大者崔某左道罔上  
輔臣懇懇為言漫以知道答之言官交章勿論也羅洪

載守職逮繫秘獄大小臣工疏十七上而說不行近又  
庇崔某之奴奪法司之守罪林俊以違旨怒言官之奏  
擾矣其他事涉中人曲降溫旨於法有礙則曰免提問  
於罪難贖則曰送司禮監奏請發落無功乞廕則曰與  
做錦衣衛百戶然則昔登用者今播棄昔嘉納者今拂  
逆昔申勅者今沮撓昔裁抑者今批復此與正德之初  
何異而明哲剛廉之士雖欲盡節竭忠勢可得乎臣聞  
俊將為去計矣俊士望也俊去而俊之類臣知其不能

留矣中間或有懷祿強顏依阿隱忍與近習私人相表裏以偷歲月之安幸禍之萬分一於不吾逮者其猷為識趣臣以為非直非俊之伍是亦私人近習而已矣然則陛下將與近習私人共理天下乎天下且帖然乎臣又知其必不能一日安也夫今日之天下寧堪此輩再敗壞耶譬之人身在昔病已貼危傷生縱欲有旦夕不救之虞然元氣猶壯一劑適中可以立起武宗承孝廟之澤是已於今病雖稍蘇元氣憊甚不必酒色七情百

毒之攻之也溫涼忒節食欲不時遂至長已陛下承武  
宗之禍是已故勵精圖治舍已從人庶幾可以已亂而  
況羣小竊權紊政以趣之哉伏願陛下憬然覺悟收還  
威柄法大舜勿疑之勇奮齊威烹阿之斷取弄權干政  
尤無良如崔某者勅送法司處之重典以塞人心以警  
其類然後務學親政遠色去讒綏留故老延訪忠言詳  
察民隱官府一體上下一心則德可堯舜治可商周功  
可祖宗陛下享無疆之祚羣臣與弼諧之榮近習私人

亦得以同樂和平矣否則人心將去天命難謀實陛下之憂亦羣臣之羞而近習私人固非便身之圖也臣實畏之

### 論朝覲考察

題為明肅政體以作新吏治事臣聞天下治亂在庶官欲庶官各舉其職以登於治則惟賞罰當而勸懲之道昭焉爾周官之法太宰會羣吏之治詔王歲終廢置三歲誅賞我朝三年朝覲考察蓋用周制而加嚴焉臣竊

聞高皇以逮憲皇孝皇之世賦墨之譴至於大辟遠配  
賢能之褒錫以綵幣羊酒此祖宗之治所以吏稱民安  
方駕前古也行之既久玩弛姑息漸失初意照得近年  
朝覲官員吏部考察畢日該科道等官於御前面劾不  
才請旨拿問蓋未聞分別等第應否也或聖恩饒免則  
其間不肖者為幸國法遂行是其間賢者為誣而况考  
察之後不才黜去者多不與待罪之列賢能留用者顧  
皆在被劾之科其又有治行出眾應得褒嘉者槩受屈

辱尤非所以覈事情公賞罰而昭懲勸也祖宗之法豈  
端使然哉是在政體事勢固當振舉之時而俗壞弊極  
宜動深長之慮恐難因循姑息如前之為矣竊思十數  
年來賞罰大權兇邪竊美非特無章幾於倒置雖違世  
特立不為沮勸者不敢厚誣天下為無人而中人之資  
隨時風靡往往而是故士人心術壞而廉節虧矣廉節  
虧而民病亟矣民病亟而愁苦怨咨干逆陰陽淪胥盜  
賊職此而已陛下膺運中興勵精復古今日大計誅賞



之始斯民一新觀聽之時正周官所謂宜用重典董仲舒所謂必變而更化者也伏乞陛下遠稽周官上繩祖武大奮明斷勅下吏部惟以萬姓為心罔恤一家之哭嚴汰不職匪才勿拘常格故事本部該司仍將考察過天下官員貪酷闖茸名迹顯著者數人治行廉能聲實卓異者亦數人各寫手本至說事日期預先於東闕門下會同科道等官知會候至御前將不才者指名面劾請旨拿問賢者能者指名面奏請旨褒異或賜筵宴或

錫金帛餘者量為戒飭其布按二司府州縣佐貳官并各正官以事不在任者行令巡按御史嚴覈賢否得實劾奏轉行提問擬罪發落奏報仍勅吏部將應該考察官員預先案仰該城取具歇家結狀務聽說事面糾以昭賞罰以示勸懲方聽其去如此庶幾大典不為具文足以鼓舞人心丕變士習慰塞民望弼成至理矣

### 論罰言者

題為宥敢言罰失職以昭懲勸事臣抱疾私居伏讀邸

報吏科都給事中李學曾論比來賞罰命令不當者數  
事禮科給事中章僑劾東廠太監芮景賢罪狀有六戶  
部主事林應驄認罪回話遂及優禮大臣俱奉欽依各  
罰俸有差臣不覺歎息自恨奉職無狀愧服三臣之忠  
鯁深惜陛下氣驕志怠迥異初心甘蹈過舉也書曰從  
諫則聖詩曰詢于芻蕘夫有諫而從不待諫而詢徃哲  
虛心舍己以求合乎天下之公每如此今陛下不惟不  
詢且不能從又加罰焉恐非所謂與治同道者也夫使

三臣者言或未當尚與優容以勸來者况頃來戚宦私人破格之恩權豪近幸執法之宥言官章疏拂違之批答謂學曾言之不當恐不可也郭九臯四品守臣為一郡父母師帥某據其部民一面之詞奏行逮捕千里之外傳所謂父子皆獄是無上下也不然某何親於某何仇於景賢特為朝廷惜此事體耳謂僑言之不當可不可也陛下初政延用故老溫綸異數鄭重優隆蓋將賴以共安社稷凡所建白未能盡見施行廼復詰責其字

畫差謬若祇使之奉行文書然者諸臣何以安其位而行其志應驄之言似尤不宜謂之不可也然則三臣者陛下果何意而罰之俸臣未遑援引舊聞姑請以覩記聖政質之嘉靖改元以來陛下批答言者始曰這所言有理蓋深嘉之繼曰知道了尚漫應之又曰已有旨了似已厭之又曰如何這等來說則怒之矣今者直罰之耳又曰本當查究然則又將有甚於此者矣陛下下一人之身再暮之間從違如此夫豈羣臣遽皆變移狂惑莫

能將順德美抑或陛下深居高拱親宦官妾之時多  
接賢士大夫之時少樂諂媚之言恃盈成之業逸欲日  
勝驕怠漸生也晉武帝以平吳怠隋文帝以平陳驕信  
史記之至今陋之陛下睿質聖志天下想望上希堯舜  
三王而顧乃下同二君豈不大失中外之望也哉況今  
東師蠢動北敵狼顧潢池弄兵之赤子所在蠭起官軍  
俸糧缺支動十數月計數動十百萬邊倉儲蓄不給周  
歲南都旱疫方數千里近者威茂又以地震告矣人心

皇皇正仁聖憫懼延訪亟圖所以消弭極綏之時匹夫  
有言宜若重於泰山而三臣相繼因言得罪殆陛下未  
嘗少加聖心乎風旨所布孟水随形臣恐自今大小臣  
工以言為諱朝政闕遺生民困阨中外姦欺莫得上聞  
陛下孤立蔽欺之中顧倚近習私人共圖社稷至計岌  
岌乎危哉臣誠懼大患義愧敢言懷不容已非敢黨三  
臣以自爲地也若臣者少嘗有志長不如人陛下擢司  
言責已再閱歲曾無忠言嘉謨上悟聖心少裨時政方

恥素餐而學曾等乃以言罰俸比肩同列臣實厚顏如  
蒙收回學曾等三臣罰俸前旨仍罰臣俸以懲失職更  
乞以學曾等建白一一勅付該衙門議擬施行庶有得  
於不逮後之義而陛下無損納諫之明臣亦少免尸祿  
之愧且俾失職如臣者戒敢言如三臣者勵賞罰當懲  
勸昭人心奮忠益畢陳闕廷無壅禍亂可防治平易致  
矣臣不勝惓惓

乞恩送幼子



奏為乞恩送幼子事臣伏覩大明會典一款凡官吏監生妻故送幼子還鄉行勘是實具奏送順天府給引照回欽此臣原籍浙江杭州府海寧縣人由進士選授前職妻子隨任方誓披瀝以圖補報奈何命途多舛私故相撓臣妻李氏以嘉靖二年八月十一日病故遺下幼女僅周七歲前妻幼男一十五歲未周女又遠在家鄉四千里外幽明隔世嬰孺異鄉誠可憫惻臣之父母聞訃驚慟又不知其何以為情熏心憂患臣實以之雖欲

勉強在公而情牽內顧安能展布奮勵盡心事事為是  
萬不得已援例陳請伏乞聖慈矜憐特勅吏部行勘令  
臣照例給假還籍慰藉臣親安集臣子依限前來供職  
感恩益深圖報益切矣

乞恩養病

奏為乞恩養病事臣原籍浙江杭州府海寧縣人由進  
士選授今職嘉靖二年八月十一日臣妻李氏病故奏  
乞照例送幼子還鄉吏部覆奏送順天府給引照回至

嘉靖三年三月間舊患便血痰火等病復發變成癰閉  
等證病勢轉增限期將及於四月十三日具奏乞恩養  
病令義男某齋抱赴京及今已五越月屈指過時不知  
消息畏途萬里高天九重豈其遂淪風波不覩天日薄  
命厄會或當有之臣偃伏待命以日為年望久而疑且  
憂憂深而病益劇臣恐溘逝未及聞命則長逝魂魄亦  
將私恨無窮臣欲奔斃道路則死於溝瀆等耳又將姑  
待的實音信再行陳乞則愈致稽違自速誅譴臣前却

狼狽輾轉憂惶身無所容病益深痼萬不獲已忍死陳  
情復干天聽如蒙乞勅吏部移文原籍官司勘臣患病  
是實容臣在家調理不幸且死得明命以瞑目幸而視  
息少延氣血旋復即當奔赴禁垣批鱗碎首為臣死所  
無復遺憾是臣進退死生秋毫皆陛下力也

乞恩致仕報籍

奏為乞恩致仕報籍事臣見年六十六歲浙江杭州府  
海寧縣人由正德十二年進士選任兵科給事中嘉靖

二年九月十六日給假送幼子還鄉隨患便血痰火等證嘉靖三年四月十三日具奏乞恩養病嘉靖五年十二月初六日臣繼母居氏病故次年五月二十五日臣父某繼復病故積禍熏心奇痛刻骨前病因之時時間發日事醫藥有加無瘳氣血兩虧齒髮倏變沈綿既久平復愈難不意衰病踰伏之人濫得過情不虞之譽累經撫按并京堂科道等衙門薦舉節蒙吏部移咨都察院勘合劄付浙江巡按御史轉行布政司府縣催取敦

逼赴部已具病因告鳴外嘉靖十八年五月內本部題  
奉欽依補禮科給事中本年八月內舍人李茂春齋到  
本部劄付令臣到任管事伏惟聖明當天羣物快觀海  
內才智之士與時俱奮幽側覬獲明揚閒散轉圖華要  
下至卑冗披能亦思服役禁近以分霑霑澤與被光榮  
臣雖性資闇劣至於知覺利害猶夫人也忍獨甘老山  
林終萎蓬藿上千違命之誅下逮近名之謗以自絕於  
生成哉惟臣子之於君父事無不欲盡者心也時有不

容強者力也臣早因多病孱羸乘以殷憂推割精漸銷  
亡病益深痼同里交親絕迹慶弔殆已十五六年比來  
年踰六十有如七十許人體力不勝衣冠朝晡半在牀  
蓐絲絲殘息難望久延不幸臣子早夭臣孫年未成童  
勉屬後事令其服田海鹽山村改籍鮑郎場竈戶以供  
課養生臣遲速俟時委填溝壑伏望皇上察臣愚忠愚  
悃憫臣垂老宿疾乞勅吏部容臣原籍致仕儻得死正  
丘首臣瞑目長逝銜恩九地永永無極矣臣下情無任

戰慄待罪候恩懇款哀祈之至



雲村集卷三